

Borashe ba ho taka ba mehlolo

Pale ka Wendy Hartmann

Ditshwantsho ka Jiggs Snaddon-Wood



Ho na le naha e nngwe hole, hole haholo e bitswang China. Kgalekgale, naheng ena e hole haholo ho ne ho dula moshanyana e mong ya neng a bitswa Ho. Ho o ne a futsanehile, empa a le mosa. O ne a sebetsa ka thata ho fumana tjhelete e lekaneng ho reka dijo.

Le ha Ho a ne a futsanehile, o ne a thusa batho ba bang neng kapa neng ha a kgona. Ho o ne a rata le ho taka mme o ne a taka ka dinako tsohle ha a ne a e na le nako.



Ka bosiu bo bong, o ile a lora eka ho na le monnamoholo ya mo fang borashe ba ho taka bo etsang mehlolo.

“O na le pelo e ntle,” ho rialo monnamoholo torong ya hae. “Ke a bona hore o rata ho taka. Borashe ba ho taka bo etsang mehlolo ke bona. Ke batla hore o ntshepise hore o tla bo sebedisetsa ho thusa batho.”



Ha Ho a tsoha, a fumana borashe ba ho taka ba mehlolo bo le pela hae.

“Ao,” a rialo, “ke ne ke nahana hore ke toro feela.”


Ho tloha letsatsing leo, a sebedisa borashe boo ba ho taka neng kapa neng ha batho ba hloka thuso.

“Ho,” ho hoeletsa batho masimong. “Ha ho na metsi sedibeng sa rona. Re hloka metsi a ho nosetsa dijalo.”

Yaba Ho o ba takela noka. Ha a ntse a taka moralo oo, ka mohlolo noka ya hlahella mme batho ba kgona ho nosetsa dijalo tsa bona.

Yaba Ho o efellwa hore batho ba ne ba sokola ho phethola mobu, kahoo a taka setshwantsho sa kgomo le mohoma ho ba thusa. Ka dinako tsohle ha a ne a bona motho ya hlokang thuso, o ne a sebedisa borashe ba hae ba ho taka. Ka pele batho ba bangata ba tseba ka Ho le borashe ba hae ba ho taka.

Kamorawana ho moo, monna wa morui a utlwela ka borashe boo ba ho taka. “Borashe boo ba ho taka e tla ba ba ka,” a rialo mme a rera hore na o tla bo utswa jwang. “Ke tla etsa tjhelete e ngata haholo hoo ke tlang ho ba moruihadi ya fetang bohle naheng ena kaofela”. Ka letsatsi le hlahlamang a romela batho ho ya lata Ho.



“Ke batla hore o dise dikgomo tsa ka kajeno,” a rialo. “Phirimaneng a kajeno ke tla o lefa hantle.”

Ho o ne a thabile mme a disa dikgomo tsa monna eo wa morui. Empa yare ka phirimana, bakeng sa hore a lefshwe, a lahlelwa tjhankaneng a ba a amohuwa borashe ba hae ba ho taka.





“O utswitse e nngwe ya dikgomo tsa ka,” monna wa morui a bua leshano. “Borashe bona bo tla lefella molato oo a o entseng.” Qetellong, a nahana jwalo, jwale borashe ba ho taka ba mehlolo e se e le ba ka. Monna wa morui a mema metswalle yohle ya hae hore e tle ha hae.

“Dulang fatshe le shebelle mona,” a rialo. Yapa o taka ditshwantsho tse ngata ka borashe ba ho taka. Bohle ba

shebella ba shebella ... ba shebella, empa ha ho le setshwantsho se le seng se ileng sa fetoha sa phela.

“Ho etsahalang?” ha hoeletsa monna wa morui. “Tsamayang le late Ho le mo tlise mona!”

Ho o ile a tlišwa ka pela monna wa morui. Empa jwale Ho o ne a se a tseba hore monna eo ke moikgohomosi e bile o kgopo.

“Haeba o ntakela ditshwantsho tse itseng,” ha rialo monna wa morui, “mme tsa fetoha tsa phela, ke tla o lefa ke be ke o lokolle.”

Pele, Ho a tsieleha. Yaba o ba le leqheka. “Ho lokile, ke tla etsa jwalo,” Ho a araba.

“Ntho ya pele eo ke batlang hore o e take ke thaba e KGOLO e entsweng ka kgauta,” ha rialo monna wa morui. “Ke batla ho bokella kgauta eo kaofela.”

Ho a nka borashe ba ho taka ba mehlolo mme a taka lewatle. Sena sa halefisa monna wa morui.

“Hobaneng ha o taka lewatle? Ha ke batle lewatle. Ke batla thaba e entsweng ka kgauta. Jwale, phakisa o e take.”

Jwale Ho a taka thaba e entsweng ka kgauta ka nqane ho lewatle. “O tla tlameha ho tshela lewatle lena ho ya fihla mane,” a bolela jwalo.


“Taka le sekepe se seholo he hore ke kgone ho tshela lewatle lena,” ha laela monna wa morui.



Ho a bososela mme a taka sekepe se seholo. O ne a so ka a qeta ha monna wa morui a tlolela sekepeng. Ka potlako ba lelapa la hae le metswalle ya hae ba tlolela ka hara sekepe le bona mme ba kganna sekepe ho ya lewatleng.

Ho a ba shebella ka hloko. O ile a emela hore sekepe se fihlelle bohareng ba lewatele, mme a taka leqhubu le leholo. Leqhubu leo la potlakela sekepeng. Ha se se se atametse – QHUU! – la kwahela sekepe la ba la se kgaola dikotwana tse ngatangata.

Kamora moo, Ho a phela ha monate. O ne a e na le dijo tse lekaneng ho ka ja. O ne a thusa batho ha ba ne ba hloka thuso mme a taka ditshwantsho tse ngata kamoo a neng a rata ka teng.



Ka nako tse ding o ne a betsa mahlo ka nqane ho lewatele thabeng e entsweng ka kgauta. Ha ho na motho ya kileng a ya moo hobane ho ne ho se letho moo ha e se kgauta feela. Tjhe ... ho se letho ntle le kgauta feela, dikotwana tse pshatlehileng tsa sekepe le monna wa morui ya kgenneng haholo, ba lelapa la hae le metswalle yohle ya hae.

IQAPELE!

- Nahana o ne o le Ho mme o na le borashe ba ho taka. Ka borashe ba hao ba ho taka ba mehlolo, toroya dintho tsohle tseo o neng o tla di taka bakeng sa hao le ba lelapa leno kapa metswalle ya hao.



Borashe ba ho taka ba mehlolo

Pale ka Wendy Hartmann • Ditshwantsho ka Jiggs Snaddon-Wood



Setshwantsho

Pale ena e thehilwe China. Sheba mmapa wa lefatshe mme o fumane China ho wona. Ebe o fumana naha eo o dulang ho yona. Na naha ya haeno e kgolo kapa e nyane ho feta China? Na e haufi le China kapa e hole? O ne o ka ya jwang moo?



Ho bala

Eba mofuputsi paleng! Fumana mantswe paleng a o bolellang hore

- ★ Ho e ne e le motho ya mosa
- ★ mehlolo e ho borashe ba ho taka ha e ya ka ya sebeletsa monna wa morui
- ★ monna wa morui o ne a labalabela ho fihla thabeng ya kgauta
- ★ Ha ho mohla Ho a ileng a sebedisa borashe ba ho taka ba mehlolo hore ebe morui.




Ho ngola

Haeba o ne o na le borashe ba ho taka ba mehlolo jwaloka Ho, o ne o ka taka ditshwantsho tse jwang hore o thuse batho ba bang? Arola pampiri ka dikholomo tse pedi. Kholomong ya pele, ngola lethathamo la ditshwantsho tseo o ka di takang. Kholomong ya bobedi, ngola lebaka le ka sehloohong leo ka lona o ka ratang ho taka setshwantsho ka seng.

Mosebetsi wa matsoho

Sebedisa hlama ya ho bapala kapa letsopa hore o etse mofuta wa 3-D wa se seng tsa ditshwantsho tseo Ho a di takileng.



Tshebetso

Pheta pale ya hao ya borashe ba ho taka ba mehlolo. Bo shebahala jwang? Ke dintho dife tse kgethehileng tseo bo ka di etsang? Ke ba mang?

